



NYTT frå Stad kommune / juni 2022

Tilsette i Stad kommune



Sommarhelsing

Då er vi igjen komne til den tida på året då alle ser fram til nokre late og helst solfylte dagar. Ferieplanane er gjerne noko meir mangfaldige i år, så det er å håpe at alle får gjennomført det dei har planlagt etter eit par år der det meste ikkje har gått som planlagt. Eg sjølv skal no gjere eit tredje forsøk på å gjennomføre ein sykkeltur i lag med gode vener i Loire i Frankrike.

Vi er også langt inne i vårt tredje år som Stad kommune. Utfordringane med pandemien ser ut til å vere over, men vinteren og våren har vore sterkt prega av restriksjonar og ikkje minst mykje smitte og stort fråvær. Tenestene har klart å løyse oppgåvene sine, men de har nok strevd mykje med å ha nok folk med rett kompetanse på plass. Det har nok også vore vanskeleg å halde planlagt framdrift på planar, prosessar og tiltak då ressursane har gått med til å sikre den dagelege drifta og tenestetilbodet. Likevel har alle einingane laga verksemndplanar i tråd med handlingsprogrammet som vart vedteke i desember. Det har vore arbeidd med oppfølging av 10-faktor undersøkinga som vart gjennomført hausten 2021, og det har vore gjennomført leiar- og medarbeidarsamtalar i tråd med årshjulet vårt.

Vi gjekk frå ei krise til ei anna då krigen kom til Ukraina. Kommunen vart utfordra til å ta imot 140 flyktningarrett etter at det var gjort vedtak i kommunestyret om at mottaket for busetjing i 2022 skulle vere 25 personar i Stad. Trass i utfordringar med mykje smitte og mangel på mannskap, så har organisasjonen klart å omstille seg og tilpasse seg den nye situasjonen. Det har vore gjennomført eit omfattande arbeid for å legge til rette for mottak. Tenestene er budde på å ta imot barn og unge i skule og barnehage, og vi har arbeidd aktivt for å finne høvelege husvære. Det er framleis usikkert korleis dette vil utfordre oss når det gjeld tilbod om introduksjonsprogram for dei vaksne, og ikkje minst det å finne høveleg arbeid. Helsetenestene er også budde på nye utfordringar. Busetjinga har tatt lang tid, men vi er no i gong med å ta imot etter ein plan lagt i samarbeid med IMDi.

Det som i tillegg har prega dei siste månadane er arbeidet med å omstille drifta av organisasjonen til eit lågare kostnadsnivå. Utfordringa framover går fram av økonomiplanen som vart vedteken i desember. Den viser oss at vi må redusere drifta på både kort og lang sikt. Omstillingsprosjektet har difor gått over i ein ny fase med planar for omfattande gjennomgang av strukturar og tiltak. Kommunestyret gjorde følgjande vedtak: «*Stad kommunestyre ber kommunedirektøren setje i verk ein systematisk gjennomgang av kva som er mogleg å gjennomføre av strukturelle og organisatoriske endringar i heile kommuneorganisasjonen.*» Vi har difor starta ein prosess med leiarane våre, verneomboda og dei tillitsvalde. Det er ei krevjande oppgåve å redusere på dei «rette» områda, så vi løyser ikkje dette med stillingsstopp i ein periode då vi må syte for at vi har rett kompetanse i dei ulike tenestene til ei kvar tid. Omstillingsarbeidet vil difor måtte omhandle både justering av bemanning, kontinuerleg forbetring i tenesteytinga og endring av arbeidsmåtar og samarbeidsformer. Ein vil også måtte sjå på endring av strukturar både administrativt og ute i tenestene. Vi har godkjent mandat til vel 20 ulike prosjekt som omfattar alle sektorområda og

Nyt velfortente
feriedagar!

Riktig
god sommar!

stabseiningane. Det er ulik tidshorisont på dei ulike prosjekta, men det som er felles er at det er krevjande for tenestene å finne tid til å drive omstettingsprosjekta samstundes som dei skal gi gode tenester til innbyggjarane. Men alle forstår at vi ikkje har noko val, så folk sluttar opp om arbeidet som må gjerast.

Det er viktig at vi tar oss tid til å få fram kunnskap om alternativa våre. Det at vi utgreier betyr ikkje at vi automatisk endrar, men det gir oss høve til å vege for og imot. Målet må vere gode tenester og eit økonomisk handlingsrom i framtida. Men då må også inntekter og utgifter balanserast betre enn dei gjer i dag. Sjølv om vi vart ein større kommune i 2020, så er vi framleis ein liten kommune. Ikkje i utstrekning, men i folketal. Dette betyr at det er vanskeleg å finne stordriftsfordelar då vi framleis skal gi tenester i ein desentralisert struktur. Vi vil kunne ta ut effektar på nokre område, men sidan det var lite administrative ressursar i begge kommunane, og særleg i Selje, så er det avgrensa kva som er mogleg å redusere av stillingar. Ambisjonane for kommunen er store, og det er då ein føresetnad at det er ressursar både til å styre, leie og drive tenestene, og at det også er ressursar som er tilgjengelege for å bidra til samfunnsutvikling. Vi har framleis eit pågående og omfattande planarbeid som krev mykje av ein liten organisasjon. Det er ein føresetnad for å få gode styringsdokument at det er brei og god involvering i utforminga av planar, strategiar og tiltak, og då vil slike prosessar nødvendigvis ta tid. I tillegg har vedtaket om realisering av Stad skipstunnel gitt kommuneorganisasjonen store oppgåver og utfordringar som vi har prøvd å løyse etter beste evne.

I fjor på denne tida skreiv eg følgjande i sommarhelsinga mi: «*Eg håper også at vi kan få gjennomføre besøk på alle arbeidsplassane i Stad kommune. Eg og kommunalsjefane har i lag med ordførar og varaordførar hatt ein plan om å kome rundt til alle for å gjere oss kjende. Vi kjenner godt leiarane, men det vil ha ein stor verdi å få møte våre tilsette, og ikkje minst prøve å forstå korleis de opplever arbeidsvilkåra dykkar i dei ulike tenestene. Eg håper at når eg sit og skriv julehelsinga i år, så er det med ein mykje betre kjennskap til organisasjonen eg har ansvar for å leie.*» - Vi veit alle korleis dette gjekk, så no er håpet mitt at vi skal få starte på denne rundreisa til hausten, og at vi då får møte mange av dykk i den kvardagen de står i med å gi gode tenester til innbyggjarane våre. Vi håper også å sjå mange av dykk på neste treff for tilsette. Det var svært kjekt å få gjennomføre dette i haust, og vi håper på stor oppslutnad når vi inviterer til neste samling som i år ikkje blir på hausten, men ein gong etter nyttår.


Med ønskje om ein fin sommar!

Venleg helsing

Åslaug Krogsæter
kommunedirektør

Det som ligg bak oss og det som ligg foran oss er ingenting i forhold til det som ligg i oss.

- Henry S. Haskins



Små og store ting som skjer!

Planar i arbeid - Kommunedelplan for oppvekst

Strategi og samordning / oppvekst

Stad kommune er i gang med kommunedelplan for oppvekst, og hentar no innspel frå råd, utval, innbyggjarar og andre samarbeidspartar.

- Plan for oppvekst omhandlar tema som svært mange i samfunnet er opptekne av, og som mange har ei meining om. Derfor har vi planlagt ein brei medverknadsprosess, opplyser Kristin Otneim Aarsnes, leiar for strategi og samordning i Stad kommune. Kommunen har eit særleg ansvar for å sikre aktiv medverknad frå grupper som krev særskilt tilrettelegging, derunder barn og unge. Her ønskjer vi at barn og unge blir tilstrekkeleg involvert, og har ein reel moglegheit til å påverke planarbeidet og innhaldet.

Dette er Stad kommune sin første plan for oppvekst. Utgangspunktet for planarbeidet er kommunedelplan for oppvekst 0-18 år 2017-2029 frå Eid kommune. Selje kommune har ikkje hatt ein slik plan.

Planen skal vere eit felles styringsdokument, som sikrar ein førebyggande og heilskapleg oppvekst for born og unge i kommunen, og at ressursane blir brukt der dei har best effekt. Kommunedelplan for oppvekst skal gjelde i ei 12 års-periode frå 2022-2033, og blir eit viktig styringsverktøy for alle einingar som yter tenester til barn og unge i kommunen.



Her frå arbeidsverkstad med 6. klasse på Nordfjordeid skule i mai.
Frå Stad kommune, varaordførar Siri Sandvik og Kristin Otneim Aarsnes.

I mai blei det gjennomført arbeidsverkstad med fleire av skuleklassene på Nordfjordeid, Haugen og Selje skule.

- Mange gode og reflekterte innspel frå dei unge i Stad kommune, kunne varaordførar Siri Sandvik konstantere!

Temoplan for kultur

Strategi og samordning / kultur og samfunn

For fyrste gong skal det lagast ein heilskapleg kulturplan for Stad kommune! Planen skal gjelde for perioden 2023-2035 og gje retning for kulturarbeidet vårt dei neste 12 åra.

Kunnskapsgrunnlag for planen er under utarbeiding, og i heile juni blir det arrangert innspelsmøter for innbyggjarane. I løpet av hausten skal planen ferdigstillast og sendast ut på høyring, før den skal politisk vedtakast i februar 2023.

- For å få ein god plan er det viktig at så mange som mogleg deltek med sine innspel og ønsker for kulturlivet i Stad. Vi vil gjerne ha di meining også! Kva er viktig for deg at står i kulturplanen? Bruk 5 minutt og svar på [spørjeskjemaet du finn her](#) på vår heimeside, oppmodar kultursjef Geir Holmen.



Kommunedelplan for helse og omsorg

Strategi og samordning / helse og omsorg

Stad formannskap har vedteke å starte arbeidet med ny kommunedelplan for helse og omsorg. Planen skal følge opp kommuneplanen sin samfunnsdel, og vere ein strategisk plan med vekt på utvikling av samfunn og tenester, som møter samfunnsutfordringane på kort og lang sikt.

- Kommunedelplanen vil vere styrande for tenestene og danne grunnlaget for prioriteringar, og slik sett danne rammene for den lokale helse- og omsorgspolitikken i Stad kommune framover, seier Cecilie Åshammar, samfunnsplanleggar i Stad kommune.

Stad formannskap vedtok planprogrammet for arbeidet med kommunedelplan for helse og omsorg 2023-2035 i [F-sak 22/074](#), 9. juni 2022. I planprogrammet er det gjort nærmere greie for bakgrunn, formål, korleis ein tenkjer å legge til rette for medverknad i planprosessen, korleis planarbeidet skal organiserast og kva framdriftsplan ein legg opp til.

Brei medverknad

- Alt planarbeid er viktig, men dette er ein av dei større planane vi jobbar med, og det blir særstakt viktig å ha ein brei medverknadsprosess. Alle har rett til å kome med sine meiningar undervegs. Både innbyggjarar og lokale lag og organisasjonar vert spesielt oppfordra til å involvere seg. Aktiv deltaking er viktig for lokaldemokratiet, for lokal samfunnsutvikling og for å få ein god plan, understrekar Cecilie.

Planarbeidet er no inne i innsiktsfasen, som er første del av arbeidet. I denne fasen vil det bli utarbeidd eit kunnskapsgrunnlag som dannar grunnlag for å ta val knytt til strategiske satsingar for framtida. I arbeidet med kunnskapsgrunnlaget vil det også bli gjort nærmere greie for avgrensing i planarbeidet oppimot andre planar, anna planarbeid, samt korleis helse og omsorg heng saman med andre tema.

[Les meir om planarbeidet her.](#)



- Aktiv deltaking er viktig for lokaldemokratiet, for lokal samfunnsutvikling og for å få ein god plan, påpeikar Cecilie Åshammar, samfunnsplanlegger i Stad kommune.

STAD

Kommunedelplan for helse og omsorg 2023-2035
- vedteke **planprogram**

God helse
Godde liv

Stad kommune 9. juni 2022
Vedteke av Stad formannskap i F-sak 22/074

Stad kommune

Meiningsfullt og aktivt liv

Stad kommune jobbar breitt for å oppnå målsettinga om eit aktivt og meiningsfullt liv for born og unge i kommunen. Her kan du lese litt om aktivitetane som pågår i sommar:

Lokal samfunnsutvikling / frivilligsentralane

Sommarjobb for ungdom frå 14-20

Eid Frivilligsentral og Selje Frivilligsentral har også i år fått tildelt pengar frå Gjensidigestiftelsen til Sommarhjelper i Stad kommune. Ordninga skal gje ungdom mellom 14 og 20 år frå Stad kommune moglegheit til å skaffe seg sommarjobb i 1-3 veker i sommar.

- I fjor var dette eit populært tilbod blant unge, og vi håpte i det lengste at vi skulle få støtte til eit slikt opplegg også i år. Mange ungdomar ønsker litt ekstra å sysle med i ferien, og ikkje minst kunne tene seg nokre eigne kroner, seier Astrid Grete Torheim, leiar i Frivilligsentralen i Eid. Gjennom denne ordninga kan vi tilrettelegge og tilby jobb til enda fleire.

- Som ein del av sommarhjelp-prosjektet har ungdomane i Stad kommune også fått tilbod om gratis digitalt kurs i CV- og søknadsskriving - ein viktig døropnar for ungdommane til å kome seg inn på arbeidsmarknaden.

I alt er det snakk om 20-25 stillingar fordelt på ulike område, men i år vert det fortrinnsvis fokus på stillingar som skal skape sommarmøteplassar for andre born og unge i kommunen. Sommarhjelpjobbar i helse- og omsorg i Stad kommune kan også bli aktuelt.

Stillingane blei utlyst i starten av juni, og det har kome inn opp mot 60 søknader. Arbeidsstad for sommarhjelpjobbane er fortrinnsvis i Selje og på Nordfjordeid.

Sommarskule for born og unge

Til saman var 363 unge i Stad kommune med på eitt eller fleire av dei tilboda i sommarskulen i 2021.

På bakgrunn av fjorårets suksess og eit breidt ønsket om å halde fram med sommarskule også i 2022, vedtok Stad kommunestyre i haust å løyve 250.000 til dette formålet. I tillegg har prosjektet i år fått støtte frå Bufdir på kr 80.000,-.

- Vi håper dette kan bli ei fast ordning for borna i Stad kommune. Også i år har det vore stor interesse for aktivitetane, og fleire av aktørane er no fullt booka og har ventelister, opplyser Arild Vonheim, som har jobba med å få tilbodet på plass.

Sommarskulen har i år aktivitetar innan 19 ulike område! Vi har prioritert å ha aktivitetar i heile kommunen vår og for alle aldersgrupper innan barne- og ungdomsskulen.

- I tillegg til å skape aktivitet for born og unge, bidrog tiltaket til at mange ungdomar også fekk seg sommarjobb i kommunen. Dette er oppskrifa også i år, seier Arild.

forts. 6



Vi treng
Sommarhjelp!

STAD
Sommarjobb
for deg mellom
14 og 20 år!

Søknadsfrist:
Fredag 10. juni.
Oppstart frå veka 27.

Ungdomar som ikkje har
sommarjobb frå før vil bli
priorisert.

Lær deg å skrive ein god CV!
Vi tilbyr CV-kurs på TEAMS:
Mand. 30.5 kl. 1000 - 1600
Torsdag. 2.6 kl. 1000 - 1800
Ingen pliktmelding.
Lenke til TEAM-kursus legg i arr.
kalender på www.stad.kommune.no
Har du spørsmål, kontakt:
Astrid til: 414 60 040
eller Mail til: 559 69 223

Foto: Arne Hilde Sætre

Frivilligsentralane i Stad kommune med støtte frå Gjensidigestiftelsen tilbyr minst 20 ungdomar sommarjobb i 3 veker i sommar. Arbeidsstid 6 timer pr. dag hovedsakelig mandag til fredag.

Sommarhjelpane skal skape sommarmøteplassar for born/ungdom
BLJA og/og sosiale møteplassar.
Sommarhjelpjobbar i helse- og omsorg og andre stader kan også
bli aktuelt.

Arbeidsstadar: Nordfjordeid og Selje
• Du som søker:
- er ein ungdom som er fødd mellom 2002-2008 (14-20 år) og har
folkeeregistrert adresse i Stad kommune.
- er ein ungdom som er pliktoppfylende, kan følge dei reglar og rutiner
som er nødvendige i arbeidsplassen.
- er ein ungdom som er kreativ, serviceinstilt, likar å organisere aktivitetar
og likar å bli kjend med og prate med nye folk.
- vill få god opplæring og oppfølging desmon du får tilbod om jobb.
- må legg ein CV når du søker.

Gjensidigestiftelsen FRIVILLIG FRIVILLIG Stad kommune




STAD
**Ung i Stad
Sommarskule**
for ein kvar!

Stad Sommarskule er eit GRATIS
tilbod til alle elevar frå 1. til 10. klasse

Her kan du borte deg i eit mangfold av kjekke
aktivitetar som lag, organisasjoner og andre
aktørar i Stad har lagt til rette for degi sommar-
ferien for å gje deg gode opplevelingar og
sommarminne!

Påmelding skjer direkte til arrangørene etter
förstemann til mellaprinsippet. Det blir mogleg
å setje seg på venteliste om aktivitetane er fulle.
Sjå meir info om aktivitetar og kontaktinfo til
arrangørene på www.stad.kommune.no



Vi tek sikte på å bygge eit konsept for vidareføring av både sommarskule og sommarhjelp-prosjektet, slik at dette blir tradisjon og gjev forutsigbarhet for både barna, unge, foreldre - og for aktørane som er med.

Tilbodet er utrøleg viktig for lokalsamfunnet vårt, på fleire felt. Barn og ungdom har fått ein sommar med ein meiningsfull kvardag, heilt uavhengig av storleiken på lommeboka til foreldra. Dette er med på å bidra til sosial utjamning i praksis, påpeikar Arild.

Eit slikt prosjekt er også samfunnsbyggande, der ulike aktørar kjem saman, der born og ungdomar frå ulike miljø kan samlast om noko kjekt og lærerikt, avsluttar Arild - som med stor glede ser at deltakarlistene fyller seg opp.



- Mykje kjekk og spennande sommarlektyre å få fatt i både på biblioteka våre på Eid og i Selje, og gjennom sommarles.no

Sommarles.no er i gang!

Kultur og samfunn / Bibliotek

Biblioteka i Stad kommune har no starta opp med sommarles-kampanjen *Sommarles!* Frå 1. juni til 31. august kan alle barn som går i 1. - 7. klasse, pluss dei som skal starte i 1. klasse til hausten, vere med på Noregs kulaste lesekampanje, saman med barn frå heile Norge.

Sommarles.no har vore ein stor suksess gjennom fleire år, og i fjor deltok over 164 000 barn i Norge. Målet med kampanjen er å motivere barna til å lese så mykje dei berre orkar i løpet av ein lang sommarferie. Sommarles.no skal gjere det ekstra kjekt å lese!

- Pr. 14. juni er det ved Stad bibliotek sine avdelingar registrert 258 sommarlesarar. Desse har til no lese 1815 bøker og 160 068 sider – men vi ønsker oss enda fleire brukarar og at dei les mange fleire bøker, sier Eli Aarvik, leiar på biblioteket i Selje. Ho oppmodar også alle andre innbyggjarar til å ta turen innom sommarope bibliotek og låne seg god sommarlektyre!

På Nordfjordeid har biblioteket sommarope frå 20. juni - 14. august kvar måndag, tysdag og torsdag frå kl 10.00-15.00. Opningstidene for Innbyggjartorget i Selje og biblioteket der er måndag 20. juni - onsdag 17. august frå kl 09.00 - 15.30.

Velkomen til å bu i Stad!

Kultur og samfunn / lokal samfunnsutvikling

Stad kommune arbeider no med ein bustadpolitisk handlingsplan som skal innehalde strategiar og tiltak for å løyse behova ein ser vil kome fram i tid.

- Gode bustadar tilpassa innbyggjarane sine ulike behov er viktig for den enkelte sin livskvalitet. Stad kommune har som målsetting at alle innbyggjarane skal kunne ha ein bustad og heim tilpassa sitt behov og livssituasjon, seier Arild Vonheim, rådgjevar for arbeidet med den nye bustadplanen.

Nytt BuStad-magasin

For nokon er bustad-draumen å bygge eigen bustad. Stad kommune ønsker å kunne tilby bustadtomter i alle dei større bygdene i kommunen, og fleire bustadområder er under planlegging.

I Stad kommune sitt nye BuStad-magasin, utgjeve i vår, finn du oversikt over alle felt med tomter for sal. Her kan du også lese litt om dei ulike bygdene og kva dei har å tilby av aktivitetar og tilbod.



[Les magasinet her!](#)

Oppgradering av servicebygget ved Seljesanden

Lokal samfunnsutvikling / kommunalteknikk

Etter mange år med myntbetaling har Selje servicebygg ved Seljesanden no fått nytt digitalt system for betaling.

- Selje hamn og Seljesanden fyller seg raskt opp på fine sommardagar. Sanden er ein populær stad for både lokalbefolking og tilreisande turistar, og med nye tilbod og attraksjonar som Selje prestegard, Selje pilegrimssenter, i tillegg til Selja kloster, ventar vi enda fleire besøkande til Selje i sommarsesongen. Då er det viktig at vi kan tilby enkle, brukarvenlege og framtidsretta løysingar for dei besøkande, seier Tonje Ramse Trædal, leiar for lokal samfunnsutvikling i Stad kommune.

Å tilpasse og oppgradere med nye system er viktig for å komme i møte endra behov og forventningar, men også for å effektivisere drift for kommunen.

- Servicebygget har no også døgnopne fasilitetar for vaskemaskin og dusj, på linje med toaletta. Desse fasilitetane har tidlegare vore stengde etter kl 16.00. Vi trur gjestane blir ekstra nøgde med eit utvida tilbod, og gjerne vel å stanse her enda litt lengre. Det er målet, seier Tonje.



Inviterer til frivilligfestival 22. juni!

Kultur og samfunn / Frivilligsentralen

22. juni vert tidenes første Nordfjord frivilligfestival arrangert i Malakoff på Nordfjordeid.

2022 er frivilligheita sitt år, og den frivillige innsatsen skal feirast rundt om i heile landet. Frivilligåret 2022 er ei nasjonal kampanje for å synleggjere og aktualisere den frivillige innsatsen, i tillegg til å auke kjennskap og få med fleire.

- I sommar skal den frivillige innsatsen i Nordfjord feirast og markerast med ein sykkeltur og Nordfjord Frivilligfestival i Malakoff, opplyser Maria Helgesen i Selje frivilligsentral. Dette er første gong det er frivilligfestival i Nordfjord – og det er veldig kjekt at vi står saman om eit slikt arrangement!

Del av ein nasjonal sykkeltur

Norges Frivilligsentralar feirar Frivilligåret 2022 med ein sykkeltur frå Nordkapp til Arendalsuka frå 21. mai til 15. august. Mellom 22. og 28. juni står Vestland for tur, og Stad har fått den første etappen i fylket - onsdag 22. juni!

- Det er frivilligsentralane i Nordfjord som har fått ansvaret for å arrangere det som skal skje denne dagen, og vi har bestemt at fokuset vert i midten av Nordfjord. Sykkelturen skal gå frå Klenkarberget sommargcamp, til Operahuset, Hogatunet Bu- og behandlingssenter og deretter til Nordfjordeid sentrum, fortel Astrid Grete Torheim i Eid frivilligsentral.

Når ein kjem til Stad rådhus på Nordfjordeid vert det sykkel og folketog gjennom sentrum og vidare til festivalen i Malakoff.

Vi håper at folk hiv seg med, er med å gå og markere dagen saman med lag og org. på frivilligfestivalen i Malakoff. Her blir det stand, utstilling, smakebitar av mat og/eller aktivitetar, framvisning m.m. Ein flott sjanse til å inspirere og bli inspirert!



Det er Gloppen frivilligsentral, Stryn frivilligsentral, Selje frivilligsentral, Bremanger frivilligsentral, Eid frivilligsentral og Vågsøy frivilligsentral som inviterer til Nordfjord frivilligfestival.

God sommar - med Opptur Stad!

Kultur og samfunn / Lokal samfunnsutvikling

Få veker etter at turboka Opptur Stad kom i hylla i landets bokhandlar er den no på 2. plass på bestseljarlista over generel litteratur! I tillegg kjem også alle bøker selde av lag og organisasjonar i Stad - som også opplever rift om boka!

- Veldig kjekt at det er stor interesse for ei slik turbok. Etter boksleppet 13. mai har vi motteke mange fine tilbakemeldingar frå folk, som synes den både er kjekk å lese i og eit nyttig turfølgje, seier Arild Vonheim, medforfattar i bokprosjektet som er utgjeve av Selja Forlag.

OPPTUR STAD skildrar dei beste turopplevingane i Stad kommune. Boka er på 400 sider og inneholder 146 turar, dei aller fleste fotturar til fjells. Her er også sentrumsvandringar, bygdevandringar og turar til historiske stadar. Boka har 7 sykkelturar. Fleire lokale aktørar, bygder og engasjerte frivillige har bidrege med innhald til boka. Både gjennom foto, tekst og historier.

- Vi håper den kan inspirere alle til å bli enda betre kjend med kommunen, skape identitet og stoltheit, bulyst, nye bekjentskap, gode turopplevingar, godt humør og god helse - ei viktig målsetting for Stad kommune, avsluttar Arild.

